



Synfocity = 846

mail us at : mzsynfo@gmail.com; mizoramsynod@gmail.com - Phone - 2314648

June 23, 2022

☐ **PES hnuaiia HSLC Result tha lawmna neih a ni**

June 17, 2022 (Zirtawpni) khan Presbyterian English School (PES) hnuaiia HSLC result tha lawmna J.M. Lloyd Hall, Synod Office-ah neih a ni.

Programme hi Pi Zirkungi Chhakchhuak, Synod Education Board Secretary-in a kaihruai a, Upa Dr. Laithanzauva, Synod Education Board Member-in hunserh hmangin Pu P.C Vanlalhraia, Supervisor of Schools-in inhmelhriattirna leh report a pe a ni. Synod Moderator Rev. Dr. Vanlalnghaka Ralte-in thu sawiin School ti thate lawmman a sem a, Rev. Dr. K. Lallawmzuala, Executive Secretary i/c Education-in thu sawiin mimal ti thate hnenah lawmman a sem bawk. Synod Office Staff ten PES Theme Song an sa a, Nl. Zoramchhani, Chanmari leh Nl. Melody Lalzirliani, Leitan Ramthar te an zai bawk. Rev. R. Lalchangliana, Synod Education Board Member-in kalkhawmte chungah lawmthu a sawi a, Rev. Vanlalmanpuia Khiangte, Synod Education Board Member-in malsawmnain hun a khar a ni.

Zirlai ti thate chawimawina hunah hian Distinction-a pass mi 97-te hnenah lawmpuina Rs.10,000/- (Singkhat) theuh hlan an ni.

PES zirlai zinga HSLC result-a Top 3 te tan Special Award siam a ni a, lawmman dawngtute chu:

1. Elizabeth Lalhlmpuii D/o Lalrintluanga Chawngthu, Tlungvel PES - Rs. 16,000/- leh Citation
2. Lalmuankimi D/o Lalmuansanga, Mamit PES - Rs. 15,000/- leh Citation
3. Lalhruaitluanga Sailo S/o Zirkunga Sailo - Rs. 14,000/- leh Citation

Saitual PES zirlai C. Zorinpuii D/o C. Lalremfela chu Mizo Subject Topper a ni a, lawmpuina Rs. 15,000/- leh Citation hlan a ni bawk.

Heng bakah hian School ti tha 3-te hnenah lawmman hlan an ni a, chungte chu:

1. Mamit PES - Desktop Computer Set + Laser Printer + Cash Award (Rs. 6,000/-)
2. Sihphir Venglai PES - Desktop Computer Set + Cash Award (Rs. 6,000/-)
3. Republic Veng PES - Desktop Computer Set + Cash Award (Rs. 3,000/-)

HSLC Exam beitu zawng zawng hi zirlai 677 an ni a, Distinction - 97, First Div. - 279, Second Div. - 190, Third Div.- 54, an vaiin zirlai 620 an pass a, Pass Percentage hi 91.58 a ni. Tun tumah hian School 34 atangin HSLC candidate an nei a ni.

☐ **Presbyterian Hindi Bible School (PHBS) Graduation Day**

June 17, 2022 (Zirtawpni) khan Presbyterian Hindi Bible School, Bawngkawn chuan Mission Kohhran Hall-ah Graduation Day vawi 68-na an hmang.

Graduation Day inkhawm hi Rev. Zochhuanmawia, Principal, Presbyterian Hindi Bible School-in a kaihruai a, Vanlalruati Sailo, Teacher, PHBS-in report a pe a, Rev. C. Sappaia, BEC member-in Zirlai chhuak tur mi 15 hnenah Certificate a hlan a, zirlai ti tha zual mi pathum-te hnenah Upa Lalbiakenga Fanai, Coordinator, SMB-in Award a hlan bawk. Zirlai ti tha ber chu Philip John Soren, Jharkhand Field atanga lo kal a ni.

Rev. R. Lalhmingsanga, Secretary, SMB-in Graduation day Address leh Message a sawi a, zir chhuak te chu "An thawhna hmun theuhah tangkai taka awm tur te, an zir thiamna hmanga kan Kohhran humhim zel tur te, zirtirna him lo laka kan Kohhran mi te venghim zel turin a fuih a ni." He hunah hian Synod Mission Choir-te tum hnih an zai bawk. Graduation day-ah hian zirlaite Guardian leh Sponsore-tu Kohhran, Zirlai Nu leh Pa te, Missionary Training College-a thawktute, Bawngkawn Kohhran aiawh te leh Synod Mission Board Office-a thawktute an tel a ni.

Presbyterian Hindi Bible School hi Hindi-a Pathian thu zirna hmun a ni a, kum 1989 atangin Hnamdang Kristian Training School tih hming pu-in kalpui a ni a, kum 1990-ah Hindi Bible School tiin thlak a ni a, 2008 Synod-in a rel angin 2009 atangin Presbyterian Hindi Bible School tih a ni ta a ni. Kum khatah batch 2 kalpui thin a ni a, zir zote chu Certificate of Theology (C.Th) pek thin a ni. Batch 68-na thlenga Graduate tawh zat chu 1610 an ni. Zirlai te Mission Field hrang hrang atanga lo kalte an ni ber a, Mizoram chung atang pawhin an awm ve thin bawk.

- **Synod Revival Speaker-te pualin Intuaitharna hun hman a ni**
 Synod Revival Speaker-te tana buatsaih Intuaitharna hun chu June 22 - 25, 2022 chhung hian Synod Conference Centre-ah riakluta neih a ni a, Revival Speaker 69 an tel thei a ni.
 Intuaitharna programme hi June 22 (Nilaini) zan khan hawwna inkhawm neih a ni a, Moderator Rev. Dr. Vanlalnghaka Ralte-in Keynote Address a sawi a ni.
 Programme an hman chhung hian Revival Speaker-ten an rawngbawl zelna tur atana pawimawh thupui chi hrang hrang - Pathian thu hril dan tha, Harhna dik, Ramhruaitu thlan chungchanga Kohhran mite buatsaih, Rinawmna leh taihmakna, Kohhran ropuina leh pawimawhna tih te zirho a ni a, heng thupui te hi mi thiam hrang hrangten an zirtir a, sawihona neih thin a ni bawk.
 June 24 (Zirtawpni) zanah kharna inkhawm neih a ni ang a, he hun hi Rev. R. Lalnuntluanga, Committee member-in a kaihruai ang a, Rev. C. Zoramawia, Senior Executive Secretary-in Pathian thuchah a sawi ang a, Mission Veng Bial Zaipawl leh Nl. R. Lalrinmawii (Arini) te hnen atangin Pathian fakna hla ngaihthlak a ni ang a. June 25 (Inrinni) tukthuan eikhamah an chhuak ang.
 Synod Revival Speaker te puala riakluta Intuaitharna hun hi harsatna dang a awm anih loh chuan kumtina neih thin a ni a. Tun dinhmunah Synod Revival Speaker 70 an awm mek a ni.
- **Synod Mission Board leh ram pawn chet velna**
- ◆ **Tripura Mission Field tlawh**
 June 21 - 24, 2022 chhung hian Tripura Mission Field chhunga Mission hmun hrang hrang tlawhin Mission Board Secretary Rev. R. Lalhminganga kalin thawktute nen inkawmhona hun tha tak an nei a. Mission Board Secretary hian June 22, 2022 (Nilaini) khan Bodhan Chandra Biak In thar hawngin Kohhran mipuite chungah lawmthu sawiin fuihna thu a sawi nghal bawk. Biak In thar hawwna hi Rev. H. Lalrinsanga, Field Secretary-in a kaihruai a, Bodhan Chandra Kohhran Zaipawl leh Noelle Vanlalruatpuii te an zai a. Biak In thar hi Kolasib Diakkawn Kohhran-in an sak sak a ni.
 - ◆ **Jharkhand Mission Field**
 June 15, 2022 (Nilaini) khan ringthar 3 Lal Isua zui turin an inpe a, June 19, 2022 (Pathianni) khan field chhung hmun hrang hrangah ringthar 12 Lal Isua zui turin an inpe bawk.
 - ◆ **Home Mission North**
 June 19, 2022 (Pathianni) khan Thaidawr Pastor Bial chhunga Mualthum Branch Church-ah ringthar 1 Lal Isua zui turin a inpe.
 - ◆ **Siliguri Mission Field**
 June 19, 2022 (Pathianni) khan ringthar 7 Lal Isua zui turin an inpe.
 - ◆ **Assam Mission Field**
 June 19, 2022 (Pathianni) khan ringthar 11 Lal Isua zui turin an inpe.
 - ◆ **Arunachal & Assam Mission Field (North)**
 June 19, 2022 (Pathianni) khan ringthar 7 Lal Isua zui turin an inpe.
 - ◆ **Masihi Sangati**
 June 20, 2022 (Thawhtanni) zan khan Chhinga Veng Kohhran Masihi Sangati leh Synod Gorkha Team ten Chhinga Veng Kohhran huam chhunga Hnamdang awm te hnenah Home Crusade nein hun an hmang a, mi 6 Lal Isua zui turin an inpe a, Crusade hi June 24, 2022 (Zirtawpni) zan thleng neih tur a ni.
- **Trust**
 June 21, 2022 (Thawhlejni) khan Kolasib-ah Vairengte Chhimveng Pastor Quarters ram Pass buaipuiin Pu K. Lalremruata, O/A a kal.
- **MSSU**
- ◆ June 25, 2022 (Inrinni) hian Republic Vengthlang Kohhranah Naupang Sunday School zirtirtu training neihpui turin Trainer te - Upa Dr. Lalmachhuana, Upa Lalrosanga Kawlni leh Upa B. Lalmunliana te an kal ang a, zan inkhawmah Upa B. Lalmunliana'n Fanau enkawl chungchang thuchah a sawi ang.
 - ◆ June 25, 2022 (Inrinni) hian Zobawk Bialah Sunday School zirtirtu training neihpui turin Pu Lalmunzauva Tlau, Asst. Coordinator leh Trainer te - Upa Zohmangaiha leh Upa Hrilthansanga te an kal ang.

❑ **Social Front**

June 26, 2022 (Pathianni) hian Biate-ah Synod Social Front programme-in Intodelh, Political education leh Ruihhlo leh HIV/AIDS Campaign nei turin Resource Person te - Rev. Dr. F.H. Liansangzuala, Upa S.R. Thangmingliana leh T.Upa K. Lalengzama te an kal ang.

❑ **Finance**

June 26, 2022 (Pathianni) hian Lungleng-I Pastor Bialah Finance Campaign nei turin Campaigner te - Rev. P.C. Pachhunga, Upa Ramtharlina leh Upa P.C Vanlalrova te an kal ang.

❑ **Synod Relief Fund**

Tun hnaia harsatna hrang hrang nei te hnenah Synod Relief Fund atangin hetiang hian chhawmdawlna pek a ni.

S.No	Khua	Pek chhan	Chhungkaw zat	Pek zat
1.	Tuikhurhlu	Leimin tuar	3	Rs. 30,000/-
2.	Kepran	In kang	2	Rs. 20,000/-
3.	Airfield	Leimin tuar	1	Rs. 10,000/-
4.	Sairang Dinthar	Damlo	1	Rs. 8,000/-
5.	Bungthuam	Damlo	1	Rs. 8,000/-
6.	Kualmawi	Vanduaina tawk	1	Rs. 8,000/-
			BELHKHAWM	Rs. 84,000/-

❑ **Hruaina Eng FM Radio :**

JUNE 24, 2022 (Zirtawpni) (FM Zoawi - Aizawl & Lunglei @ 7:30 p.m.):

Solo : RTC Lalduhawmi - Minung ram
Zaipawl : Thingsai Bial Zaipawl - Tihdam ka ni ta
Thusawi : Upa Lalrammawia Ngente - Tunlai khawvel leh Kristian nun
Solo : Malsawmzuali - Vana Lallukhum
Zaipawl : Chaltlang Bial Zaipawl- Nun Krista

❑ **Susamachar Prasaran Programme :**

JUNE 26, 2022 (Pathianni) 5:00 pm. :

Group/Choir/Solo : Khatla South Female Voice - Shukrya
Group/Choir/Solo : Chanmari West - Yesu Mere
Sermon : Lalhruaitluanga - Isu Kaun hai
Group/Choir/Solo : P.C Lianhmingthanga - Sahara
Group/Choir/Solo : Zotlang - Sara Zaha

❑ **Moderator leh Executive Secretary-te Programme:**

Rev. Dr. Vanlalnghaka Ralte : Moderator

June 25, 2022 Biak In hawn - Lengpui Kohhran
 June 26, 2022 Chawhnu - Vaivakawn Vengthlang Kohhran
 Zan - Vaivakawn Kohhran
 June 27, 2022 PRESCOM BEC
 June 28, 2022 Apex Bank Annual General Assembly (Hunserh) & Central KTP committee

Rev. C. Zoramawia : Senior Executive Secretary

Zin programme nei lovin Office-ah a awm ang.

Rev. V.L. Luaia Hranleh : Executive Secretary

June 27, 2022 PRESCOM BEC
 June 28 - July 1, 2022 PCI Constitution Revision Committee, Shillong

Rev. Dr. K. Lallawmzuala : Executive Secretary

June 27, 2022 Masihi Sangati Kendra Working committee
 June 28 - July 1, 2022 UCPI meeting, Bangalore
 July 1 & 2, 2022 Jharkhand Mission Field - Retreat

HRIATTIRNA

Synod bu 2021 a chhuak tawh a, Synod Office-ah a lam theih e.

HNA RUAK DIL THEIH

Mizoram Presbyterian Kohhran hnuaiiah *Mizoram Christian College (MCC)*-a Contract-a thawk turin a hnuaiia hnate hi a ruak a, kum 18-35, ni 22.7.2022-a kum 18 tling, kum 35 la pumhlum lo, zuk leh hmuama fihlim, Presbyterian Kohhran mi tan dil theih a ni. Hna dilna Form chu 16.6.2022 (Ningani) atangin Synod Office (Aizawl leh Lunglei)-ah lakchhuah theih a ni ang. Dilna hi Synod Office, Aizawl-ah thehluh tur a ni a. Application form man Rs. 20/- a ni. Hna dilna Form-ah hriat tur pawimawh tihlan a ni.

1. Hna hming : **Laboratory Assistant, Post - 1**
Thiamna : HSSLC or Equivalent
Hlawh : Synod hnuaiia Contract Laboratory Assistant te hlawh
2. Hna hming : **Office Assistant (Library), Post - 1**
Thiamna : HSLC of any recognised board with a fiar knowledge of computer
Hlawh : Synod hnuaiia Contract Office Assistant te hlawh

Dil theih hun chhung : Dt. 14.7.2022 (Ningani), tlai dar 3 thleng

Screening test/exam : Dt. 16.7.2022 (Inrinni), 10:00am

Interview hun : Dt. 22.7.2022, (Zirtawpni)

Sd/-

Rev. C. Zorammawia
Secretary, Synod Service Board
Synod Office

HNA RUAK DIL THEIH

Mizoram Presbyterian Kohhran hnuaiiah *Mizoram Christian College (MCC)*-a Contract-a thawk turin a hnuaiia department tarlanahte hian **Assistant Professor (Contract)** hna a ruak a, UGC Norms 2018-in a sawi ang thiamna neite tan dil theih a ni ang. Diltu chu zuk leh hmuam leh ruihtheih thila fihlim an ni tur a ni. Hna dilna Form chu 16.6.2022 (Ningani) atangin Synod Office (Aizawl leh Lunglei)-ah lakchhuah theih a ni ang. Dilna hi Synod Office, Aizawl-ah thehluh tur a ni a. Application form man Rs. 20/- a ni. Hna dilna Form-ah hriat tur pawimawh tihlan a ni.

English - 2	Mizo - 1	Political Science - 1
Sociology - 1	Public Administration - 1	Commerce - 2
Management - 2		

Hlawh : Rs. 50,000/- fixed

Dil theih hun chhung : Dt. 14.7.2022 (Ningani), tlai dar 3 thleng

Interview hun : Dt. 21-22.7.2022, 10:00AM - 5:00PM

Sd/-, Rev. C. Zorammawia
Secretary, Synod Service Board
Synod Office

MITMU LEM SIAMSAK CHUNGCHANG

June 21-25, 2022 (Thawhlejni-Inrinni) chhung hian mitmu paih tawh leh mitpualte tan mitmu lem (Prosthetic Eye) mawi taka siamsak thei tur leh khaw hmu fiah lo, Low Vision Device mamawhte tan Synod Hospital, Eye Unit, Durtlang-ah Soham Low Vision Clinic/Ocular Prosthesis Centre, Kolkatta atangin mi thiam bik an lo kal a. A mamawh tan pan theih a ni.

Prosthetic Eye leh Device te hi mamawh dan a zirin Rs. 5,000 - Rs. 1,00,000 man a ni ang.

Hrechiang duh chuan Ph. 8794390319-ah zawh fiah theih reng a ni.

Sd/- Director
Synod Hospital